



Policija izuzela dokumentaciju SIPA u Širokom Brijegu i dalje istražuje Lijanoviće

Sud BiH odbio prijedlog advokata da
se uhapšeni brane sa slobode



Jerko Ivanković Lijanović: Još u pritvoru

Pripadnici Državne agencije za istrage i zaštitu (SIPA) nastavili su jučer istragu u Širokom Brijegu protiv braće Lijanović i njima bliskih osoba koje se sumnjiče za više krivičnih djela kojima su oštetili državu za više od 5,5 miliona eura.

Prema riječima portparola SIPA-e Kristine Jozić, policajci su na području Širokog Brijega izvodili pretrese i prikupljali dokumentaciju u vezi s poslovanjem kompanija u vlasništvu Lijanovića u sklopu akcije „Brend“.

Dodala je da je akcija okončana jučer u poslijepodnevnom satima te da su pripadnici SIPA-e izuzeli dio dokumentacije.

Nada Dalipagić, advokat koji zastupa više osumnjičenih osoba, kazala je da su policijski službenici obavili

pretres u prostorijama trgovinskog preduzeća „Diona“ u Širokom Brijegu.

Drugi advokat, Davor Martinović, izvijestio je da je Sud BiH odbio zahtjev odbrane da trojica braće Lijanović, Jerko, Jozo i Slavo, te još četiri stranački i poslovne bliske osobe budu pušteni da se brane sa slobode.

Njima je ranije određen jednomjesečni pritvor u kojem će ostati do 10. oktobra, na šta se odbrana žalila.

Među osumnjičenima u pritvoru se nalaze dopredsjednik Vlade FBiH i ministar poljoprivrede Jerko Ivanković Lijanović, kao i ministar trgovine FBiH Milorad Bahilj. U pritvoru su još trojica direktora Lijanovićeve kompanije, dok su za još tri osobe izrečene mjere zabrane napuštanja BiH. **M. Aš.**